

摘藻堂四庫全書薈要

集部

欽定四庫全書薈要

集部

明文衡卷十八



詳校官候選知縣臣吳國華

欽定四庫全書叢要卷二萬一百七十一

集部

明文衡卷十八

明程敏政編

銘

玉兔泉銘

并序

劉基

自古有以勢軋天下箱人口使和己者鮮不由細微  
以及大此姦人之素能也故高之馬莽之祥瑞惟其  
言而莫之違然後大詐行而大欲得矣秦檜之事宋

高宗也以岳將軍之武之忠且排搆之殺其身以及其子反以為功而宋之君臣莫不從其指則亦何求而不得哉玉兔之泉以清美為建業城中第一豈昔顯而今堙者檜實知之耶或有善察土脈工穿井之術者密以語檜而神之以白兔耶則皆不可知也夫檜之罔民設詐豈下於高莽哉白兔之是非無關天下之大事是故賢人君子忽之而莫與較於是乎鄙夫諂子遂探其意而夸之以為佞是蓋不足辯也金

華張孟無憫泉之芳潔為姦人所污而銘以雪其冤  
愛物之良心也予亦悲之為之作後玉兔泉銘銘曰  
嗚呼泉乎夫何辜為櫓所污世無吳隱之孰昭其誣嗚  
呼泉乎尼父大聖猶言其主瘠環與癰疽白兔之傳夫  
何傷於爾歟櫓死為蛆泉潔自如我作銘詩衆惑斯祛  
嗚呼泉乎終古弗渝

奎上人耘杖銘

并序

奎上人得古藤以為杖而置鋤焉將以兩其用也名

之曰耒杖而劉基為之銘曰

耒可以取魚而不可以繫駕帶可以繫襦而不可以貫珠孰眇其癯而多乃需既予老是扶又歲葬之除畀康勿起以弗迷厥塗杖乎杖乎歲月逝夫子也予俱

耒物銘

并序

王禕

古之君子於凡御服之物日用所接者皆著銘焉名其器而因之以自警則進德修業之功無乎弗在矣大學所載湯之盤銘大戴記及金匱陰謀所載武王

器械諸銘是也余因竊取古義即凡器物各為之銘  
非敢貽于博雅之君子蓋庶幾動作之間私致其警  
焉爾合之得五十首

今錄二十首

冠銘

爾形之端故居吾元吾德苟或愆曷居人之先

佩銘

動中規矩鳴中律呂庶其為予輔

履銘

義之趨信之踐毋蹈非毋臨險

枕銘

體木而圓于以警吾昏體石而方于以安吾常

席銘

我身之逸今藉爾以為偃也我心之直今匪爾之可卷也

衾銘

舉而施之庇乎一體苟能推之覆幬乎遐邇



帳銘

起處毋溷乎而褻不可徇乎而隱顯公順乎而獨不可  
慎乎而

筭銘

非義勿納非禮勿發

梳銘

布帛大素其尚親附也錦繡黼黻如之何弗拒也

鼎銘

鉉有金玉享受福矣或折爾足覆公餗矣

鏡銘

貌之妍醜爾則辨其外心之淑慝爾曷鑒其內

櫛銘

髮之亂也可以理之政之禁也曷以治之

尺銘

百分之積乃成乎尺尺而復累吾不知其止學之為功

固如是

印銘

質金相文玉章德之臧名乃長

觚銘

以此書文常思明以此書事常思平以此書獄常思生  
以此書財常思輕

琴銘

情性之正以防其淫造化之妙以鉤其深嗚呼聖人吾  
不得而見之矣欲知舜文王周公孔子者微乎斯音曷

以得其心

匱銘

虛其中厥有容維能容久則充

榻銘

坐如尸敬以持有弗莊者人所非

屏銘

心不可蔽可蔽者目天不可蔽可蔽者人

劍銘

水斬蛟鱷陸刺象犀盡少忍之以全物軀

理齋銘

并序 朱升

理者文理之謂也兩間之物象凡其自然生成者莫不各有文理存焉交互者謂之文條達者謂之理理之緻者莫如玉故理之為字从玉而里聲易曰仰以觀於天文俯以察於地理星之經緯日月道之出入凡在天者莫非交互之文川北山牡三條兩戒凡在地者莫非條達之理理緻者莫如玉製字者既从玉

以為理之字矣玉之外物理之緻者又莫如木果之栗者故稱玉者曰溫潤而栗然書曰寬而栗記曰溫而理寬也溫也疑若為渾然者故繼之曰栗曰理以足其義知此則知理之字本義矣然則古先民之謂理皆即物而指其條達者以示人如所謂文理密察足以有別所謂依乎天理批大卻導大窾者非超乎物而言也自吾夫子之贊易也有曰窮理盡性以至於命而後之言性理者宗焉夷考夫子之言而求其

旨蓋以為理出於性性原於命聖人作易其著數卦  
爻之用由渾然而疏通之則和順於道德而理於義  
由粲然者而本原之則窮理盡性以至於命所謂  
理者未嘗以為在性之前者也程子之言性曰性即  
理也朱子以性之仁為愛之理義為宜之理禮智為  
恭別之理夫愛也宜也恭也別也四者因用而後見  
而其本則出於性譬諸草木其枝柯不一也循而視  
其理則皆出於其根是故善言性者因其愛宜恭別

之用不同而窮其理之本諸中者則汴流而源見其  
派焉而不混也於是因其用之愛而窮其理之本乎  
性者則謂仁因其用之宜而窮其理之本乎性者則  
謂之義是仁義禮智也者因愛宜恭別之理而立名  
者也以朱子愛宜恭別之理之訓而讀程子性則理  
也之言則庶乎其可通矣理云理云渾淪渙漫之云  
乎哉吾宗有仲兄者淮海之英也名珍而字理且以  
理名其齋是得字義之本非常情常辭也謹述字義



為之齋銘以為理也者不在於字亦不在於齋而在於心也銘曰

元化默運流行不已物象肖之渾然之中有文有理理者條達亘乎終始有疏有密有曲有直而無交殺物理惟玉其緻無比理之為字所以从玉諧聲以里窮理盡性說卦有言以理言性有條不紊惟程朱子萬物之理皆備於已彌綸叅贊民生日用咸有統紀原始要終明彼取此應事接物行其所知舉而措耳倚歟吾宗天資

王美既珍其名理以為字齋顏亦爾人見吾宗溫然佳  
士服其夷曠挹其和萃仰其儀軌未必知其學優其仕  
事至物來徹上徹下條理如是我作銘詩其直如矢稽  
首齋名洗心聖言秋月寒水

菜邁六器銘

唐肅

余子治圃越南城屋其中曰菜邁栗軒先生既銘之唐  
肅復銘其器六以余子之治圃也其藝菜也必以鉏銘  
其鋤曰鑿而植本斯立培而墾蕪斯茂衡深淺毋爾苟

既孰矣其灌之也必以甕銘其甕曰泉之容伊德之充  
泉之吐伊澤之溥其緇勿羸其挈勿隳勿事乎桔槔之  
機既灌矣而少害焉薈之必以刃銘其刃曰惡草之滋  
資女以剪夷弗剪而夷則茅塞其蹊草去矣菜豐矣采  
之必以筐銘其筐曰掇其美毋以下體斂其實勿滿而  
溢虛而受之乃其德左之右之慎爾執采而得之芼之  
必以釜薦之必以盤銘其釜曰漑于斯享于斯我有旨  
畜甘如飴彼鼎食者殆而銘其盤曰脂弗我污兮羶弗

我慕兮惟味道之助兮銘已余子曰噫子善銘吾罷切  
於物與於理其足為吾儆乎請書之菜邁以繼渠軒之  
作於是手書

羅經銘

并序 王景

羅經指南車之屑也其法以磁針定其子午子午正  
而二十四位皆正噫化機若是之可握歟為之銘曰  
混而茫規洪厖奠玄黃天昆侖廓八埏孰用宣我無為  
司南離挈坤維役萬靈幹曜星為民正大化元聖治原

翼蟬聯忒其恒馮翼憤杳冥冥法其施亂是釐靜應之  
唯其然握坤乾於萬年

世直堂銘

有序

楊榮

翰林侍讀文江周功敘名其所居之堂曰世直蓋以  
其六世伯祖伯寬仕宋直寶謨閣憤賈似道誤國嘗  
疏斥其奸會大父鰲溪山長以立元至正中修三史  
上書請以宋為正統而附載遼金父職方員外岐鳳  
國朝永樂中為漢府紀善王有異謀作寶賢堂箴以

諫三君子者皆言人所不敢言終不少沮非直道之  
至其能然乎矧功敘以名堂其善於繼述又未可量  
矣為之銘曰

天有直氣在人能全人有直節貴世其傳周之世直寶  
謨諤諤繼以鰲溪職方有作歷宋及元至我皇明勁辭  
正色蟬聯厥聲莫熾相奸臣強主弱炎錄既微孰攻其  
惡莫奈帝統外先內書彼勢方昌自尊其徒莫偕王謀  
窺覲儲位梁園納邪曷輔以義壯哉朱雲乞斬安昌麟

經貶楚董相格王直道不容官奚不黜其黜復揚皇鑑  
如日文江之滸有堂潭潭喬木如雲鬱與天叅我銘先  
猷以迪乃後永執厥心奕世有耀

石磬銘

并序

胡儼

余在雲間友人王以東遺余石磬色黝而質堅形制  
曲折皆出自然非人力所為左長於右右不及左者  
寸餘云其父嘗得之泗州合磬山中叩之其聲泠然  
以圓石聲律中姑洗角每清夜鼓琴之餘時以小角

椎戛擊音韻清遠儼若神明之臨燕休之際其亦存  
誠之一助也乃為之銘曰

泗濱之山孕玄璞曲折自然匪礲琢審音諧律姑洗角  
聖云遠兮襄不作遺音泠泠度寥廓

忠孝堂銘

并序

王直

國家之興必有豪傑卓越之才達乎忠孝之大節者  
以翼昌運續世功然後能享高爵重祿以傳于子孫  
而延之久遠若太師英國張公其人也公之尊父河



間忠武王昔事太宗皇帝于潛邸掌護衛兵其姿度  
雄爽知略超邁而武勇絕人最為上所親任及靖難  
兵起上每授以成算戰勝攻取無難者諸將皆敬讓  
之時公亦提兵從王王嘗語公曰吾受上恩思輔成  
大業以報殊遇爾當勦力一心庶幾如吾志古人以  
事君不忠莅官不敬戰陳無勇為非孝爾能盡忠乃  
所以為孝也公頓首受教獎率所部摧鋒陷陣所向  
有功未幾王薨太宗皇帝素奇公召而慰勉之俾以

其兵自效曰爾毋忘爾父之志公感上之德與先王之教益自奮勵卒成大勲凡上有所命南征北伐無不盡其心奇略偉績載之信史功名富貴無出其右者迨事四聖小心寅畏前後四十年如一日公既受顯爵位師臣王亦膺隆命配享太廟此忠孝之報也暨修先朝實錄公再為監修今上皇帝緝熙聖學公實知經筵事敬恭朝夕從容進退凜乎儒者氣象嘗謂直曰先王以忠孝為訓吾既奉以周旋不敢失墜

雖幸而有立然今老矣惟列聖之大德不敢忘於心而亦敢忘先王之舊訓乎因揭以名堂將終勉之且使吾子孫登斯堂者亦思所以繼吾志日夜勉焉盡心於其職庶無負於國而亦不辱其先子宜為我銘直聞之忠孝臣子之大節天理之當然也誠能盡其道則必享福祿之榮而子孫保之昔者召穆公能嗣其祖康公之業有功於周宣王錫之圭瓚秬鬯以祀其先祖又錫之山川土田以傳其子孫詩人歌之至

今誦焉公嗣先王勲烈著於國家顯榮褒大實有累  
朝之錫命誠無讓於穆公而尤惓惓以忠孝自勉且  
以勉其後之人國家有億萬年之慶張氏之福亦豈  
有窮哉乃為之銘曰

天生斯民賦厥衷為子必孝為臣忠惟師英公德兼崇  
卓立宛有前賢風桓桓先王才且雄捧日直上扶桑東  
奄然馭氣超鴻濛祗率遺訓績武功披雲卷霧開晦蒙  
九霄奮躍攀飛龍宣威蠻貊靡不通明明列聖眷遇隆

仁漸義洽恩豐彤紀勲旂常銘鼎鐘王亦顯祀升閔宮  
周家召虎庶其同攸攸夙夜懷謙冲揭以銘堂圖始終  
勗爾後嗣躡令蹤事君奉先益致恭國家萬年福無窮

鐘銘 并序

鐘之作官府以謹朝夕浮屠老子之宮以嚴祀而近  
世富室多置焉何居予既作祠堂以祀祖考諸子取  
嚴奉之意亦請置鐘予則兼取謹朝夕之義欲以警  
昏惰故弗拒因推祖考示教子孫之心而為銘曰

有鐘在縣聲聞于天祠事則甚虔然惟德是先進脩之  
功夙夜當惓惓若沉酣麪藥之毒恣肆於衽席之安雖  
殷殷聞聞而聽之藐然迷天理之途溺人欲之淵昏惰  
而弗悛既不可謂孝亦豈曰能賢則神將厭之而何福  
之有焉嗟爾子孫警惕弗愆勉而有以百世之傳

公勤堂銘

并序 馬愉

刑部侍郎楊侯彥謚采寢嘉語名其堂曰公勤蓋欲  
視警以求乎不負也間以求言故為銘以相之銘曰

善事服衆匪公弗得樹勲立業匪勤不克克已循理公  
孰與儔無倦匪懈勤孰與侔是以君子務其在己人爵  
既修天爵自至有偉楊侯公勤名堂副以吾力褒自綸  
章書戒臧私易勉不息積善有慶惠迪乃吉昔聞其語  
今見斯人駸駸夙夜造何可倫

石鐘山銘

有序 楊守陳

彭蠡之口有山名石鐘尚矣後魏酈元以為下臨深  
潭微風鼓浪水石相搏響若洪鐘也而唐李渤非之

謂如其說則瀕流庶峰皆可冠以斯名蓋潭際雙石叩而聆之南聲函胡北音清越石鐘也而宋蘇軾非之謂石之鏗然有聲者所在皆是何獨此以鐘名蓋山下皆石穴微波入之聲噌吰如鐘鼓中流大石空中多竅與風水吞吐有窾坎鏗豁之聲嘗觀察而得其實故是酈矣而周必大又謂上鐘石高四尺下鐘石濶餘丈叩之皆響若鐘磬他石則否復是李馬余謂波間衆竅其豐山之自鳴者乎潭際雙石其宋



左師之每擊者乎是皆可謂鐘也然瀕流庶峰其下  
響若鐘者蓋鮮石之高大而叩之函胡清越如兩鍾  
石者亦安得所在皆是且山之以物象名者若石鼓  
文筆之類亦豈必為天下獨然後名哉訪名山者其  
舟而察諸波間邪果屐而叩諸潭際邪抑若大寧之  
山嘗有巨石狀如大鏞而今已為波淪之九鼎火焚  
之崑玉邪是皆不可知者事不目見耳聞而可臆斷  
其有無蘇之戒也前四人皆目見耳聞而言猶不能

定於一余固不敢臆斷顧區區一山名何損益於天下亦無足深辨者聞之故老我太祖高皇帝伐僞漢陳友諒時駐師湖口嘗登是山既而大捷友諒殪焉時群敵惟友諒最彊難克肆勞六飛躬駕後戡四方皆指授將帥勢為破竹然則湖口之捷實天下之基也方登山時廟筭先定聖謨孔神高陟遠覽之頃固已空七澤而奄八荒矣抑或山靈水伯變草木為甲兵驅龍魚為蹕警以張皇威助聖武邪凡山川獲一

賢貴登臨以名於世皆可謂幸是山迺蒙玉趾親臨  
龍顏寵顧一岑一壑至今猶有輝耀何幸尚焉古之  
人睹河洛則思禹功往在元季微我高祖民其殲矣  
今四海內外百年之間庶職恬逸萬民乂和雖群動  
庶植猶勝於亂世之烝黎者皆高祖戡定輯寧之勞  
而列聖紹述煦嫗之澤也凡登是山者左顧彭蠡右  
瞻金陵江漢之心其可已哉兵部正郎王尚忠嘗讀  
書于山之佛閣間屬余言故為之銘俾鑱諸崖石用

告來者舍其細而懷其大云銘曰

楚有巨浸漫五百里曰鄱陽湖蓋古彭蠡陽鳥攸居禹  
貢肇紀其委之窮或扼其衝有山特起嵯嶭穹窿水經  
載之其名石鐘往在元季有梟橫厲江漢之間雲擾麻  
沸崇岡震驚汜可小惕天命聖武舟師徂征矛戟百萬  
颶馳霆鉤烈火西耀煌煌赤城虜衄而逋拒之湖口迺  
躋兩鐘以望九有驚旂前登羽衛擁後猿麋群遊魚騰  
鳥將雲霞增耀木石焜煌天覽電矚已空荆湘玉輅方

降捷音沸騰矢激酋殪厥衆角崩或者草木奮為甲兵  
四方群敵茲虜惟劇一鼓殲之餘何庸力席卷萬邦拯  
其焚溺永康兆民垂億萬世峻德穹勲惟天其至謂山  
蓋高曷足與儷山有巨石舊銘禹功苔蝕蘚剝有光流  
虹相古勲業亦銘鼎鐘於皇聖明式配神禹宜偕厥銘  
以耀終古厲我臣民無忘烈祖

明文衡卷十八

欽定四庫全書薈要卷一萬一百七十二

集部

明文衡卷十九

明 程敏政 編

頌

平江漢頌 并序 宋濂

天命皇上為億兆生民主旌麾所向悉臣悉庭初以一旅之師興濠泗間遂撫淮南平江東攻浙東西下之版圖所入方數千里定都江左發政施仁戴白之

叟垂髫之童涵泳至化皞皞熙熙如承平時于時陳  
友諒據有江漢之地僭居大號賊殺其主飭修蒙衝  
虐驅烝黎如蹈水火不自度力又集蜂蟻之衆直窺  
豫章三月不解皇赫斯怒乃召群臣于庭而告之曰  
陳虜不道敢屢予侮昔者蕩搖我邊方侵軼我姑孰  
伺偵恥慶切  
候也我金陵賴爾一二臣鄰之力攻而敗之  
予亦親覆其穴巢中宵竄走假息武昌予不忍追殲  
之冀其悔禍以自逭於天刑癸卯之夏乃復圍我豫



章是其凶德無厭自取殄滅此天亡之時天之明威

予不敢不順唯爾熊羆之臣不二心之士尚弼予以

成厥功群臣曰都於是右丞臣達叅知政事臣遇春

帳前親兵指揮使臣國勝同知樞密院事臣永忠臣

通海備厥戎器簡厥師徒以俟七月癸酉上躬擐甲

胄禡

師祭也

纛龍江帥樓船數百蔽江而上陳虜大驚

解圍而逃丁亥與我師遇鄱陽湖之康郎山戊子上

分舟師為十二屯命達遇春永忠突入虜陣呼聲動

天地矢鋒雨集砲聲雷鉤波濤起立飛火照耀百里  
之內水色盡赤焚溺死者動一二萬流屍如蟻滿望  
無際己丑焚偽平章舟刈戮餘二千辛卯復酣戰虜  
將張定邊素號衆猛上親禦之將士皆死戰歷一二  
時遇春等左右夾擊殺士卒無算張中矢百餘而退  
潛保鞋山不敢吐氣我師亦據湖口扼彼喉襟列柵  
南北江岸置大筏中流水陸嚴戒以候其發八月虜  
食盡遣舟五百艘掠糧都昌又為我大將所獲壬戌

虜計窮冒死突出將上趨九江上命諸將一時俱合  
其大戰如戊子自辰達酉督戰益急友諒中飛矢斃  
于舟中癸亥降其衆五萬上命釋之不戮一人凱歌  
而旋舳艫相銜旌旗飛翻不疾不徐委蛇而來萬姓  
歡迎俯伏道左山川草木皆有喜色告廟飲至行賞  
論功賜遇春田若干永忠田若干其餘將士賚金繒  
有差臣稽在昔曹操治水軍八十萬來攻孫權而周  
瑜黃蓋敗之於赤壁苻堅發長安戎卒六十餘萬騎

二十七萬以侵晉而謝玄謝石敗之於淝水然赤壁  
不過一焚而走淝水亦不過軍亂而奔初未嘗大戰  
也而史臣且書之以為千古美談矧今湖口之捷血  
戰累日天地為之晦冥日月為之無光山川為之震  
盪其神功駿烈炳耀鏗鉤與天無極較之二國未足  
多讓而歌咏不作非甚闕典歟臣謹備著其事撰為  
詞頌一通以流鴻績於無窮以俟太史氏之采錄云  
其詞曰

天眷有德實為哲皇肆其神略以靖寇攘義旄東指罔  
敢弗恭風烈虎嘯雲游龍驤長淮既歸江左攸屬浙之  
東西樹侯置牧乃建國家以奠南服以懷中原以控西  
蜀蠢爾小醜敢讐大邦集其兇頑鋒蝟斧塘輕涉我疆  
以跳以踉亦既剪刈僵骸覆江海齊六軍直傾其穴釋  
而勿誅俾自懲刷闔胡不然復豕而咥翹其蟲臂當吾  
車轍皇明震怒歷告在廷是決不悛命將往征爾選舟  
師爾整甲兵漕爾糗糧各罄爾誠搖光在中夷則之月

襦牙江濱皇東巨鉞以誓以戒以速其發紀律精明颺

火奮激旗旒揚揚

漢江切

艘竹江切

將將矛戈洸洸鎧冑

明明載怒載厲載飛載颺雄威所吞已無荆湘既與虜

逢大呼衝擊藥騰蒸礮星流火戟虐燄電奔巨轟雷劈

殺氣冥蒙不辨咫尺矢鋒所貫什伍聯聯縱橫交紐命

隕弗顛攢梳湊颺筍束蝟編流尸塞川舟行弗前虜魄

既褫扶創而逸聚于湖奧僅存喘息我方植柵江之南

北火筏在流掩蔽如翼越歷四旬飛走途窮將冒萬死

以絕其衝我師見之千膽如龍似兔之走而鷹之從酣

戰六時由辰達酉僕姑

矢名也

一發殪此酋首貫睛及顙

仆若枯柳大慙既除餘不能醜遞相告言我誠不振我  
草我頑我歸至仁誰謂培塿可高嶙峋再拜稽首來降  
來臣皇曰俞哉汝俘予受宥汝弗劉予汝父母汝凍予  
衣汝饑予哺昔何昏迷今始撤部奏凱而旋騎吹鬱搖  
形於樂歌節以鐃饒飲至于廟頒賞于朝帛堆其家肉  
登其庖都人聚觀舉手加額或嘆或謠有聲嘖嘖干戈

相尋匪一朝夕自今昇平可坐而筴惟皇神武動則克  
之羣策盡屈四方式之惟皇寬慈降則釋之義聲動盪  
疇能敵之惟皇明斷遇事即決洞見千里不隔一髮所  
以西征成此駿烈小大畢朝孰敢肆孽在昔赤壁洎乎  
合肥事以幸集尚傳策書況茲之功俊偉赫熹揆古無  
讓可無咏詩臣雖微賤文字是職對揚皇休并獻臣臆  
三代以還用仁興國皇宜遵行永作民極

膏露頌

并序



洪武二年冬十月十有三日甲戌膏露降于乾清宮  
後苑蒼松之上皇帝勅中官折示禁林諸臣光潤如  
酒凝結如珠肪白飴甘彌布松柯馨烈之氣叢達左  
右勃鬱淋漓薰涵太猷天休震動中外嘆嗟又明日  
丙子上御外朝左丞相宣國公臣善長帥群臣稱賀  
上若曰甘露之降載在往牒然休咎之徵當以類應  
朕惡足以致斯卿等尚明為朕言之叅知政事臣稼  
對曰聖人之德上及太清下及太寧中及萬靈則膏

露呈瑞陛下敬恭天地輯和人民故天不愛道而嘉祥徵顯也起居注臣觀對曰帝王恩及於物順於人而甘露降陛下誕寬民賦衆庶驩豫底于敎寧神應之臻職此故也翰林侍講學士臣素對曰王者敬養耆老則甘露降而松栢受之尊賢容衆則竹葦受之今露降于松則陛下養老之所致也宜以制幣策告宗廟頒於史館以永億萬年無疆之聞上情存損挹皆推而不居言既已丞相帥其班以退翰林學士臣

濂竊伏自念氏北有星名為天乳若明而潤則膏露  
下焉王者德格於上恩覃於下靈氛充牣秘貺斯甄  
此天人感應之常理也欽惟皇上興自臨濠匹馬渡  
江十五年間遂成帝業天瑞育滋不一而足彩霞成  
鳳卿雲聚繡赤鳥飛翔白兔俯伏瑞蓮並蒂嘉木孕  
文實皆天之所命非人力所致而自至者今又覩茲  
聖徵則其德洞淪冥功成不宰三瑞皆至千休滋彰  
有不期然而然者矣雖然傳有之受命不于天于其

人休符不于祥于其仁所以孔子之作春秋祥瑞不  
書而有年則書豈不以天道玄遠難知而人事之為  
可徵者乎皇上以天縱之聖留神至治以得仁賢為  
瑞以五風十雨為祥視彼前代植金莖以承液夸嘉  
瑞以紀年者未嘗不指以為戒則其英明之識超絕  
之智卓冠百王為法萬世是宜美盛德之形容播諸  
樂歌被之管絃以示聖子神孫於無窮云其辭曰  
上天降康甘露之灑於祭其英純乾發自陽以布於下

方凝於休祥其祥伊何靈氣孔多有甘者液載仁推澤  
潛靈是錫誕啟皇之德天地相合鴻休翕集厭厭浥浥  
紛紛密密匪隨日以食兆厥聖徵如卿之雲如景之星  
如日之重輪冲和氤氲以文我太平惟皇之聖貞符自  
應不卑而泳不高而迎第祿之攸盛惟皇之明貞符爾  
承不歆而傾不忤而盈第祿之攸寧休慶之即四國之  
式有濯厥聲耀于千齡

嘉瓜頌

并序

皇明式于九圍德漸仁被和氣薰蒸靈物效祥乃洪武五年夏六月嘉瓜生於句容張觀之園雙實同蒂圓如合璧奇姿分輝紺色交潤誠為曠世之產壬寅京尹臣遇林函以素匱圖其形于上移文儀曹請以奏聞癸卯尚書臣凱等奉瓜以獻時上御武樓中書右丞相臣廣洋左丞臣庸同知大都督府事臣英御史中丞臣寧翰林學士臣濂咸侍左右天顏怡愉重瞳屢回良久乃言曰徵之往牒其事云何丞相奏言

漢元和中嘉瓜生于郡國唐汴州亦獻嘉瓜禎祥之  
應有自來矣陛下勵精圖治超漢軼唐故天錫之珍  
符太平有象實見于茲上謙讓弗居俄思靈貺之臻  
復不可不承乃詔內臣寘諸乾清宮翌日甲辰薦諸  
太廟臣濂退而思之夫瓜蒌力果切蔓生曰蒌之屬也其蔓  
遠引其葉阜蕃諸傳有之神瓜合形表縣縣之慶此  
固兆聖子神孫享億萬載無疆之祉況瓜之所出本  
於回紇中國討而獲之故名為西方今皇上命大將

軍統師西征甘肅西涼諸郡俱下而瓜沙已入職方  
行見西域三十六國同心來朝駢肩入貢天顯叶瑞  
其又不在於茲乎然而異畝同穎周公作歸禾之篇  
三秀合圖班氏有靈芝之歌矧此嘉植含滋發馨昭  
宣我神應焜煌我王度寧可喑

於金於甘二  
切啼極無聲

默而遂

已乎顧臣駑劣不足以美盛德之形容謹上其事願  
宣付史館以備實錄復繫之以頌頌曰

乾道載清坤維用寧保合太和發為休禎句容之墟物



無疵癘神瓜挺出殊實同蒂瓜孰非單此合而生二氣

毓質雙星降精蜜房均甘冰圭競爽明月重輪髣髴堪

象豈無賓連產於戶東

叶

疇若茲瓜協瑞聯祥亦有華

平張翠作蓋疇若茲瓜交輝映彩其兆伊何蘿圖繇延

西域既柔德冒八埏群臣曰都載拜稽首神休滋彰天

子萬壽粵從啟運靈貺疊甄兩岐麥秀合柑

方無切  
花萼足

孕

蓮矧此貞符近在輦轂王化自邇遠無不服帝曰吁哉

朕猶歟然瑞當在人物胡得專使物為祥宜獻清廟自

我先人積慶所召孰瑞不矜帝則弗居唯親是思我民之徒以實應天斯乃盛德小臣作頌以示罔極

鳳陽府新鑄大鐘頌

并序

皇帝既正大統建都江表德綏威讐萬邦咸臣用群臣奏臨濠為龍飛之地賜名曰鳳陽南北民大和會百族錯居動十萬數然而物大而盛不假麗齊一之無以嚴昏旦之禁乃詔江陰侯吳良監鑄大鐘以定衆志以裨治化侯既受詔遣使者至富春山中徵金

工何成諭以天子明命即日帥其屬十六人以從相  
地鳳陽城東三里搏泥成範畫其銑甬衡之度侈弇  
為良篆帶以方候其燥剛始穿一十又三鍊青赤銅  
六萬五千斤筮以洪武乙卯冬十一月己巳蒞事厥  
明侯具法服以牛一羊一豕一祝告先治之神禮既  
成橐籥咸興鼓動風氣炎光赫曦上貫霄漢絳液既  
澄氣憤雲洩循竇而入肅肅有聲陽施陰凝勁質斯  
具越二日辛未乃發復取牲血塗其罍隙以厭除不

祥鐘高十六尺有五寸厚六寸徑十尺有五寸圍三十四尺有奇混融其輪圓熒熒其容輝信技殫於人巧妙奪於神功者也於是營構層臺副以簏簣聚千夫之力鉅絙而登之一杵之撞隱隱闐闐雷旋電奔震撼太虛遐邇聞者靡不聳愕會濂扈從青宮幸鳳陽親觀盛美侯遂請濂為之頌濂聞先王之世金部有七黃鐘乃樂之所自出而景鐘又為黃鐘之本所謂景鐘大鐘也其受至於九斛而止律呂由是而

應陰陽由是而均夫豈細故也哉秦漢以來寢失其制小鍾或數尺大鍾或容千石皆不本於律度今我熙朝稽古右文定於中制宣導天地孚洽神人中和所致嘉瑞畢協增拓化原亦於是乎有賴非特嚴昏旦之禁而已濂待罪國史以文辭為職業義當發揚蹈厲以鳴國家之盛侯之有請不敢固辭頌曰

維天穆清鼓以雷霆適昭天聲百物以生維帝濬哲法天之烈大鏞斯揭元氣噴洩睠于濠梁真龍飛翔乘陰

御陽洗濯八荒神物攸起是為帝里從者如雨於焉萃  
止物大而豐往來憧憧節之以鏞罔敢弗恭乃飭鳧氏  
乃具爐錘乃烹乃鬻化金為水赤氣夜明如日之升流  
亟而頽入竇有聲彬彬斐斐功同神鬼不鉏不鋸輪圓  
順軌既啟其型敢愛斯牲塗釁禮成榮光如星千夫齊  
力臺構懸植交扛孔奭載考載擊宅兮囷囷觸兮賁賁  
摩乾盪坤以警昕昏發攄靈氣昭融品彙物無疵癘年  
穀攸遂博碩而龐聲與正通拓美集祥熏于家邦惟皇

建極福之敷錫制器有赫式和民則稽樂之原鍾實為  
先律呂以宣功垂不刊小臣作頌有美無諷爰咨于衆  
是傳是誦

瑞麥頌

并序

劉基

天厭元德九州縻沸群猾竝作黎民惶惶奔走無路  
皇帝提三尺劔奮起草萊指顧之間豪傑景附矛鋒  
所向戰克攻取皇帝心知天意之有在爰舉有衆以  
與萬姓請命一征而取荆襄再征而清浙江三征而

閩海率從四征而席卷全齊五征而定周及梁遂取  
秦晉舉燕趙南交北貊東東西羌海外之邦莫不望  
風遣使奉朔稱臣拜伏闕庭於是民獲所歸上下神  
祇咸有依託慶雲甘露潄奏禎祥帝心謙抑每讓弗  
居洪武三年五月陝西寶雞縣進瑞麥一莖五穗者  
一本三穗者三本兩穗者十有餘本蓋自兵興以來  
王保保據周宋李思齊張思道據秦燕晉趙齊梁之  
間大豪小猾或憑城郭或聚山寨皆假元為名分割



境土擅兵相攻於是燕晉周秦之地彌數千里連歲  
無雨百穀不生民相殺食且盡今年夏四月王師奏  
捷于蘭州朔漠掃清闕隴底定天乃大降甘雨滋為  
嘉瑞和氣致祥不亦昭哉周頌有曰綏萬邦屢豐年  
天命匪懈傳者謂商之季年比歲旱荒至周武王克  
紂受命而天下遂獲豐年由今觀之信非誣矣漢謠  
以麥穗兩岐歌其太守之美政則是兩岐之麥世所  
希有而況於三岐至五岐者哉頌聲之作弗可闕也

頌曰

神雀赤鳥其羽不可以為儀紫芝甘露其實不可以療  
饑豈若五穀之為瑞可以厚民之生豐國之資者哉元  
失其鹿天下共逐擾擾紛紛強食弱肉皇天振怒誕命  
真主肅將天威以靖區宇騎士如雲猛將如龍發縱指  
示悉出帝衷既平南東遂定西北民居攸奠品物咸殖  
爰有嘉麥一本三岐布葉萋萋結實離離既齊既平先  
百穀成擢穎揚芒金支翠英溥彼原田滃若雲煙望之

油油卽之芊芊其種伊何降自穹昊其瑞伊何豐年之  
兆豐年穰穰頌聲洋洋其始自今奕世無疆

祀方丘頌

并序

維洪武三年五月二十日戊申日北至皇帝將祀地  
祇于方丘乃先期九日潔齋于舊宮詔百僚集射西  
苑命之曰古人有言惟德動天惟誠感神故射以觀  
德誠於中者必形于外不可掩也惟爾庶官各一乃  
心以致其誠毋替朕命群臣自左丞相宣國公以下

至于有司百執事皆拜手稽首曰敢不欽承天子之  
明命維大江之南土每夏四五月多霖雨少霽是歲  
雨作連日至十有七日乙巳皇帝御法駕率百僚告  
于太廟遂居于齋宮雨勢未已至丁未日夜二鼓有  
風徐來淋漓頓收微月出雲氛霧廓清皇帝被袞冕  
登壇萬籟無聲華燭有輝雅樂瀏亮燎烟不搖百禮  
既洽千官肅雍洋洋乎神明臨之在上誠意懇至升  
降秩秩濟濟翼翼穆穆如也比明竣事薰風應節和

氣交暢小大咸喜知誠德之感格若合符契大命所  
集皇天后土信不忒也於是弘文館學士臣基謹獻  
頌曰

濬哲惟帝父天母地維孝維誠斯承其意孝誠既備物  
以將之神鑒在德匪惟其儀聖不世出禮失莫求弗澄  
其源曷清其流水流之極禮儀并廢豈無牛羊而不以  
祭穹祗赫怒監觀萬方式昭大命命我聖皇維我聖皇  
克孝克誠提三尺劔由一旅興奮于長淮長淮具宗濟

于大江大江攸同漢沔既朝閩浙率從施及廣海化外  
之邦望風占雲獻其琛寶稽首龍墀蹈舞從容乃命虎  
臣越濟踰河雲旆霓旌鐵馬金戈蹴踏泰岱憑陵華嵩  
鋤秦鏟燕掃胡滌戎莫亢我前莫膺我鋒斬逆懷降允  
協天衷自西自東自南自北罔不懌懌戴天子德天子  
之德格于上下既禋于郊又敬于社人懷其仁神錫之  
嘏圓方所包無不服者超黃邁唐越商踰夏小臣作詩  
以繼大雅

平西蜀頌

并序

臣聞天命真主混一六合必先有以為之驅除然後收拾以歸其籠自古及今同一揆矣是故冬寒之極必有陽春激湍之下必有深潭大亂之後必有大治理則然也元德既衰九土糜湍鴟張狼顧之豪彌滿山澤萬姓魚喁無所籲告天乃命我皇帝肅將武威代伐乎不道故一伐而定荆湖再伐而舉全吳三伐而海甸廓清四伐而東粵南閩悉歸版圖於是四伐

中原拾宋掇秦犁趙拔燕兵鋒未至聲聞先及神讐

鬼慄匍匐俯伏玄羌青伏崑崙大漠交趾據耳之國  
罔不獻琛奉表稽首闕下無敢後者獨明昇竊據巴  
蜀雖遣使奉貢而不去偽號大臣皆請討之皇帝憐  
其父沒子幼數遣使招之不至乃命將帥師伐之洪  
武四年大軍破瞿唐殺其將某郡邑鎮戍望風送款  
昇乃率其官屬奉璽印詣軍門請降蓋自建國至是  
凡五年而天下一統何其易耶固知天命有在而群



雄並起為之驅除也臣基受恩深厚無能補報遙聞  
捷音歡喜踴躍不能自已謹撰平西蜀頌一首雖不  
足以贊揚聖德萬一亦聊以寓葵藿嚮日之忱云爾  
其辭曰

惟彼蜀國開自蠡叢山川隔閼與華不通金牛啟道厥  
竅斯鑿岷峨岩堯始連井絡秦以之霸漢以之王諸葛  
用之震驚北方劔閣倚天瞿唐拆地仰不可攀俯不可  
視蠢茲羌戎憑其險阻罔知天命大邦是距洸洸虎臣

受命于征出師桓桓如雷如霆如雷如霆天子之威廟  
筭先定鬼神莫違靈旗揮揮指山山摧羌人失魂慙若  
死灰爰將其臣奉其版籍稽首軍門面縛銜璧六軍奏  
凱聲動玄黃黼童白叟蹈舞康莊四海會同豐年穰穰  
慶雲甘露自天降祥臣拜稽首受天之佑受天之佑天  
子萬壽

東征詩

有序

胡翰

荆東行中書右丞李公以親賢之重總制軍民輯寧

金華嚴陵信安括蒼廣信諸暨五郡一州之地諸暨  
城小而偏於張虜雖以重兵鎮之虜猶數犯境上今  
年春遂大率其屬入寇邊吏告警公合將士由嚴陵  
馳援距諸暨新城十里曰龍潭據其地與寇相持明  
日寇以我師新集空壁豕突而前公望見即下令曰  
彼衆我寡唯効死斬擊耳毋掠人馬貪而失利又仰  
而祝曰願天佑社稷微臣不敢愛其生以縱敵於是  
將士皆奮公策馬陷其中堅手槍斃數人左右縱擊

遇者靡地躪而殲之流血膏野斃者萬餘人逐北虜  
其驍將百數十人凱旋之日上功幕府公推兩指揮  
群帥之力居多天子嘉念之賜予甚渥昔南仲召虎  
左右王室戡除寇戎詩人歌之不以二人克專勤勞  
顧乃歸美天子之命稱誦四方之平今日之事惟授  
任得人以故公與將士茂建厥績天下聞者皆知我  
師之罔敵舉群雄而脫其距角合海內而登于大一  
統之治昭哉徵乎其在茲矣不可啗無紀述迺敘而

賦之以備凱奏焉詩曰

天造草昧篤生真主暨厥良弼大啟土宇自荆之東郡  
邑棋布阻山帶川樹屏為固與敵相制邦之門戶匪親  
與賢疇克畀付桓桓我公兩有文武龍節虎符來自王  
所坐總省轄出奠邦土于宣于蕃孰敢余侮蠢爾夷孽  
竊活鼎釜以其螳臂抗我戎輅歲直乙巳中繩建斗大  
裒厥允深入我阻偪我新城搖我黎庶勢如累卵岌其  
可怖邊吏驚告公起馳赴軍于龍潭柵其高阜轅門方

樹士食未飽寇偵我勞謂可拾取蝟興蜂午鼎來縱橫

深絕其澗高馮其陵有輕我心不知我勦我用大奮奮

其忠貞師直為壯彼則何名以少擊衆在古可徵爰今

衆旅告厥神明願天孚佑爾衆欽承毋利虜獲不竭股

肱望其前鋒公則是膺挺身躍馬其揚如鷹如鷹如虎

其徒烝烝如雷如霆孰震弗崩束戈就殞投刀乞生倏

忽紛紜席卷而平流血殷野橫屍一成匪曰嗜殺亦豈

窮兵寇來授首唯惡是懲既懲其惡亦罔不矜亦莫不

寧天開日明衿甲旋旆肅肅其征椎牛饗士獻俘于庭  
皇心允懌是用大賚公走入覲稽首拜賜明明我皇制  
勝萬里師力臣武悉任指使滄海波平金微道啟防風  
不朝塗山用乂惠迪有慶從逆自殪公昔受鉞志在敵  
愾繼今以往尚罔或怠不怠不亟公心抑抑下民是依  
庶士是式為邦柱石以殷皇國皇國既平四夷既率公  
之孫子與國罔極

行樞密院判官鄧公勲德頌

并序 朱升

歲辛卯淮西兵起明年自蘄渡江者蹂饒陷徽江東  
大擾至于丁酉六月之間勝負相尋徽民受兵者凡  
十有二矣而猶不知所終也於是泗水鄧公奉江南  
行省平章公命由宣取徽先聲所至不戮一人郡邑  
以定公淑德夙成威信昭著始至則立城堡作廬舍  
旬日竣事而民不知有役納降附下條教村疇帖服  
而民不知有軍分兵戍諸縣掄才以官治之軍民有  
職上下相維遺黎乃知免矣將官張思總戍休寧縣



能宣布公之德美以福其民庶又請邑士朱升作頌  
以傳之頌曰


徽之為郡介乎萬山昔有革代招附以安曩歲淮兵渡  
江窺浙直搗于徽肆其燔劫突來游至奔北相仍六勝  
六負哀哉民生猗歟辦章秣陵開省勲業崇崇紀綱井  
井既克宛陵南復楚疆有獻于公請事徽方公曰噫嘻  
無窮于遠叢爾山城其邊三面策者曰否彼鄰杭封全  
有三關浙右囊中公曰噫嘻茲為重役總率招徠必資

淑德曰鄧友德茁其蘭芽汝父汝兄致命邦家宣衆未  
降長搶餘黨既屯于徽懼殘彼壤事有機速為我南行  
汝親吾養汝家吾承鄧公曰唯惟辨章今辨章之心徽  
人之命爰勅渠帥即日啟行衛兵之胡新附之湯江淮  
之雄苗獍之銳列騎聯旗兩州相綴惟徽厭亂城郭久  
空諸軍畢入誅其萊蓬既柵既城以營以室將士分功  
成之旬日乃納降附漿酒溫存受其雞豚為之饗殮使  
觀其軍使行其壘意氣包涵家人笑語民曰此軍與吾

為儕曩者轢我吾寧服懷士曰此軍非曩之匹閭幘衣  
冠中原典則曩之來者驅民為兵何為強弱徒殲厥生  
曩之來者每事報復指撻吹求熾然荼毒今茲下令軍  
民判然不教之衆奔北之先今茲下令新自今日毋長  
澆風酷為指撻流離還定漸復其初里有耕桑家有詩  
書凡此之功在於鎮靜萬喙同聲歸功于鄧鎮靜之道  
制勝之規謝公指顧秦敗淮淝鎮靜之道教治之式曹  
師蓋公民以寧一繫公懿質辨章登之進之于學王而

成之雲臺元功少年杖策人謂我公今之高密以究勞  
績以開隆平秉心罔替引我民生徼民願公祝公眉壽  
仰被昊蒼夕昕稽首戍將承德請作詩章刻之縣齋以  
傳無疆

明文衡卷十九



總校官庶吉士臣張能照

校對官庶吉士臣陳崇本

謄錄監生臣宣葆光

欽定四庫全書薈要

集部

明文衛卷

二十一

詳校官候選知縣臣吳甸華



欽定四庫全書薈要卷二萬一百七十三

集部

明文衡卷二十

明 程敏政 編

頌

節婦黃氏旌門頌

并序

蘇伯衡

姑蘇吳縣之閭門里有旌門焉朝廷所以寵褒姚節婦者也節婦姓黃氏名妙清歸姚氏為諱榮之妻生男女各一人而榮以病卒榮卒時節婦年二十有九

子文聰纔二歲貧甚力紡績以俯育或勸其更嫁節婦曰夫死不嫁婦人之常況有子可從何為而更嫁此足一移我則匪人不聽後十二年張士誠入據姑蘇亂兵掠文聰以去數從人問消息比二年不聞問或曰異日者有子可無更嫁也今子俘矣無論死藉令生歸亦不可望不嫁將焉恃乎節婦曰我豈以子存子亡為去留者哉終不聽又四年文聰始脫身來歸節婦驚喜且泣曰姚氏有後矣我死亦無憾後八



年里耆列其狀上于縣若府監察御史為答實以聞  
制下旌其門為節婦之門則洪武七年春三月也今  
節婦嫠居且三十四年年已六十有三文聰思無以  
侈上賜而昭示罔極聞伯衡嘗蒞屬太史氏介朱恪  
即金華山中求書其事勒諸樂石伯衡惟唐虞三代  
之世其教既明其化既成其民俗之美至於比屋可  
封當是之時旌其門閭表厥宅里猶不敢緩然則所  
謂樹之風聲使民益勸於善雖唐虞三代之聖人猶

不能不以之為務也況當世降俗漓之後有天下者  
不善其善以為勸奚可哉皇帝受天景命君臨萬邦  
凡有係於風化者輒加表異蓋以此也而姚榮妻黃  
以貞節著聞蒙被寵褒如此是猶唐虞三代之民加  
唐虞三代之令典矣遠近聞之其誰不感慕而興起  
此所謂賞一而勸百者也不其休哉不其休哉夫推  
明聖意而播諸聲詩者史氏之職也因不辭而為之  
頌頌曰

天眷聖神民君民師匪曰治民亦欲迪之聖神奉天式  
和民則陰握化權作新萬國褒嘉節義錫以旌書風行  
而表孰不聿趨非有管鑄自率規矩四維既張五倫攸  
叙吳縣有婦姚妻氏黃年二十九良人遽亡儲無儋石  
室若懸磬母子煢煢相依為命霜風淒其落月照帷間  
闕機杼影與形隨人或憐之勸之他適胡乃茹荼有薺  
如蜜慷慨自誓辭與涕俱可以人焉而夫薨如我不即  
死我志靡他我下從夫我子如何子未成童掠於亂兵

倚閭而望寒暑再更僉曰已矣安知非死無子焉恃不  
嫁奚俟婦曰咈哉何言之卑我志可易太山可隳我志  
不易仰天一慙血淚雨集時既寧謚子亦生還雖無甘  
旨志養攸全郡守御史交謂宜褒乃具封章乃請于朝  
乃被綸音旌其閭里苦節之報庶其在是昔視其門門  
則以席今過其門門有綽楔楔巍巍龍光有耀匪爾  
之私俾世視微嗟臣事君猶婦從夫凡百在位曷鑒曷  
圖婦道不虧尚稱聖意臣節殫竭有不寵異刻辭堅珉

以昭鴻恩以揚清芬以詔後昆

平雲南頌

并序 王景

聖天子之御大歷服也維清緝熙載敷武功盪攘羣  
雄混一函宇於是偃武脩文與民休息垂十餘年  
皇帝若曰元綱解組土宇瓜分朕奮起淮甸鏖戰鄱  
陽江漢以清捲甲長驅遂定中夏元君北跳秦晉吳  
蜀所向風靡不十年而成大業雖天命有歸皆師武  
臣之略也維雲南一隅獨阻聲教卿謂何如僉曰雲

南塹山墉壑狼子野心聚螫挺獸況巴咱爾幹爾密  
為元臣子罔知天命宜其無嚮化心若以天兵臨之  
彼惡能敵帝曰俞哉乃命潁川侯臣傅某西平侯臣  
沐某永昌侯臣藍某將鷹揚虎校之士三十餘萬聲  
罪致討樓船蔽江旌旗亘天星流電邁分道並進大  
軍繇貴廣軼普定下牂牁深踐不毛奇軍繇羅佐關  
擊烏撒攻可渡河大會于曲靖疾若風雨所向克捷  
元兵蜂屯蟻聚毋敢抗我師者先是下令曰若至曲

靖便可輕騎長驅未至十里許大霧霧元司徒達爾瑪距烏白江為陣未成列我師泅水以濟徑前奮擊其陣遂亂達爾瑪陷于淖生擒之殺將士若干人元兵大奔遂分兵逆可渡河望風席卷梁王巴咱爾幹爾密棄城遁至晉寧率妻子死之雲南平自出師至是凡百餘日得府州若干戶若干馬牛軍實無筭三帥承制建官大軍鎮焉遂下大理拔金齒凡雲南故壤皆郡縣矣明年遣使降車里降緬降八百咸以壤

奠貢洪惟天兵不浹十辰拓地萬里西南諸夷悉臣

悉妾何成功之速哉蓋天子文武神聖徯來望切而  
有三帥善長駕遠馭也上自漢唐以迄于元羈縻而  
已乃今與內地等功高千古信乎王者之無外也又  
明年班師振旅獻俘授馘定功行賞封傳某為潁國  
公諸將以下進爵有差於乎古之有盛德大烈必形  
諸歌頌皇風興大雅作草茅微臣不敢多讓謹稽首  
頓首而為頌曰



皇明御天統有萬方際天蟠穹武功煌煌三光耀靈海  
宇聿清叶氣嘉生蒸為太平蠢茲蠻方稔藏奸宄恇恇  
穰穰以褻天常乾坤之量海嶽是包彼昏而狂誕敢呌  
呌皇赫斯怒爰整元戎吉日載戒車攻馬同於鑠王師  
赫赫桓桓天討是將震懾百蠻兵無留行勢若震霆日  
星晦霧江海沸騰鷹揚曲靖俘彼統酋征麾所指載揚  
天休戰不貪殺殺不却降斥原疏旆以迄用康大憝聿  
逋筐玄筐黃拓禹之跡維周職方表方建官綦布星分

仡仡大城以奠其民封豕脩蛇以變以化昔也狻猊今  
為騶虞載駟載伐戈鋌不腥南金象齒罔敢弗庭凡此  
南功三帥僉同維一乃心上毗帝聰大烈之龐超漢軼  
唐風雲胥慶天地開張會朝清明聖化基之萬國一統  
坐而釐之草茅微臣作此頌焉武功告成

四夷咸賓詩

有序

解縉

皇帝臨大寶之明年紀元永樂嘉與萬方共躋仁壽  
一德感孚休祥昭應民安物阜四夷畢來東若朝鮮

日本暹羅東南若琉球中山南有安南占城西南  
海東洋瓜哇鬼方緬國木邦孟定麓川威遠八百老  
撾里車西若烏斯尼挖巴拉西北輝和爾匈奴哈密遠者  
數萬朝聞夕引奉貢儀物皆至京師其文辭稱述盛  
德對揚鴻休誠服心悅發見于外殊音重譯異服奇  
詭懽忻攸同嚮慕無已庶衆聚觀天下忭喜咸相謂  
聖神光被如日月之照臨天行雨施妙運莫測垂裳  
拱手於穆清而有生之類盛利見于四方萬里之遠

鼓舞輻輳而歸之來享來王而不能已吾民何幸而  
臻茲嘉會實萬世一時也朝之羣臣亦咸相謂虞舜  
有三苗之征周公有戎狄之膺宣王逐玁狁而秦漢  
及隋疲弊中國力夫之爭無時或寧唐宋否極上天  
厭罪命我太祖聖神文武欽明啟運俊德成功統天  
大孝高皇帝起而定之不令而從不言而化八表同  
風四十餘年皇帝以聖繼聖比隆唐虞殊方歸命者  
接迹而至宜有詩歌垂之頌聲軼遠古而過之又咸

謂臣縉宜為義不可辭則合羣臣百姓之言從容奏  
寫皇帝曰咨周家九夷通道大保進旅獒之訓虞廷  
干羽既舞伯益有微戒之箴故愚者常以小康肆志  
賢者不以外物動心朕方兢業於初服是何足云頌  
聲其為作君臣相飭之歌以繼虞周之治臣縉竊謂  
自古頌美而寓規諫皆臣子摠誠委曲之小心臣愚  
不及此乃自皇上發之是誠萬世一時也謹拜手稽  
首而獻詩曰

皇帝明德與天同運華夏奠安四夷効順限山阻海風  
氣不通不招不約奔走來同梯陟峻阪航涉濤瀾洹寒  
溽暑赤雪玄霜殊形奇醜異服紛龐鬢髮焦赤睽眴深  
黃猩唇猥喙黎面文身袒跣椎結皮裳卉巾離披落索  
搖曳縈纏鞢鞢殊音侏離異言呶呶重譯舍館授粢窮  
物式陳兼金玉瓚齒革羽毛服食器用皇帝儉勤異物  
非重厚往薄來懷柔無外八表同仁膺茲嘉會以心感  
人人心自歸其來無喜矧往或追陋彼漢唐好大喜功

本之不競而末是從苟得其人不為富强苟得其地不足廣疆耳目細玩惟彼所產耽玩惑心悔之已晚皇帝明德謹之於細慎始惟終圖難於易照乘之珠衆庶所喜詎若得賢照千萬里四夷畢來衆庶榮之曷若中夏一民無饑明良責難安不忘危小臣作戒賢聖是師

御書嘉禾詩頌有序

洪武二十有八年秋九月壬辰朔庚戌北平永清衛之龍門禾有異莖同穗之祥其三榦合為一仍三穗

者二二幹合為一仍二穗者六是歲大熟今上皇帝  
遣使來進羣臣上表賀太祖聖神文武欽明啟運俊  
德成功統天大孝高皇帝親御翰墨為詩一章以賜  
今上皇帝其詩首言創業之艱天命之不易除暴禁  
亂之師撫民致治之略中言天錫豐登之屢史書垂  
示之嚴明堂裡薦之重末示謙沖戒謹之意為善不  
足之誠大矜下民之惠與民同樂之盛心溢於言表  
蓋不以嘉禾之祥為可矜而以為可懼而思以自勉



聖不自聖兢兢業業足以垂訓於千萬年今上皇帝  
服膺聖訓念手澤之存諷誦追維不能自己乃永樂  
三年九月朔旦用摹勒于石拓本裝治成軸分賜諸  
王及近臣於是臣縉亦得與賜焉又適有嘉禾之瑞  
臣縉仰惟日月之光華昭著于天地其溢而上者為  
慶雲為景星為霞五色其下者為璿珠為美玉為丹  
砂使人歆慕而寶愛者皆日月之餘光也古先聖帝  
明王有日月光華之德其禮樂文章流風遺韻之傳

若詩書所刻百世之下光景常新猶足以使人歆慕  
與景星慶雲諸福之物同一快覩而況身被其澤目  
覩其盛鼓舞涵濡其有不發而為華封之祝康衢之  
謠以自鳴其慶幸之萬一乎實人情之所不能自己  
也拜手稽首而獻頌曰

洪武乙亥秋穀登朔方龍門嘉禾生三穗二穗交兩騰  
異本同類同敷榮蒞珠金粟隔露凝親藩錫貢來神京  
玉匣上有黃雲蒸袞衣當日御彤廷百辟忻嘉陳休徵

四野懽呼傳頌聲帝曰俞哉稽之經旅命歸禾凜不矜  
作詩致戒尤丁寧昌言受命畏天明降福穰穰恐弗勝  
庸錫親藩鍾聖情亦知玄德由茲弘十年事驗天威靈  
聖孝通天推至誠永樂重華信有禎賜詩日閱心屏營  
手澤猶存訓服膺每御翰墨懷牆羹想當睿思玉几憑  
智周八極通杳冥重念稼穡憂農耕暑寒怨咨憐獨熒  
祇願年登百穀成羣臣環列忭且驚百神降監來軒盈  
雲霞的皪飛陶泓鴻章聖藻驅風霆造化萬彙皆流形

工巧人為何足稱奎章爛爛不可名但見東壁餘光精  
刻以端溪紫玉英摹本裝以龍鸞綾頒錫羣臣荷寵榮  
天球大訓河圖并人文至寶奠八紘夜夜虹光燭太清  
聖子神孫萬億齡萬世黎民歌太平

視學詩有序 胡廣

皇帝即位之初載夙夜延訪羣臣博詢治道從容燕  
暇召二三儒臣于前而諭之曰使天下人人崇尚儒  
術其道何由咸頓首惶懼不敢言明日又問訖無敢

以對上曰必使天下人人崇尚儒術其機在上於是  
咸稽首曰誠如陛下所言至是求賢之詔屢下凡巖  
穴幽潛之士占一技能者即禮聘至闕下親承顧問  
命之以職而優待之故四海之內罔有遺才焉明年  
策多士于廷簡其尤者二十八人俾究極羣書期其  
至于古人一切政事不以干之恒祿之外復有他賜  
鼓舞作興之道至矣天下之士聞風而歆慕者皆奮  
躍於下有菁莪棫樸之盛乃永樂四年二月朔勅羣

臣曰孔子萬世帝王之師其道之在天下載於六經  
天下不可一日無生民生民不可一日無孔子之道  
朕將臨國學躬禮孔子以稱尊崇之典所司其差吉  
日行之於是有司差以三月朔日辛卯是日昧爽上  
備法駕謁廟行釋菜禮先是命禮官考謁廟儀禮官  
奏宋服靴袍行再拜上曰見先師禮寧過厚至是上  
服皮弁行四拜禮禮畢駕幸大學授經祭酒臣儼司  
業臣智賜之坐講文武三品以上及翰林儒臣皆賜

坐聽講講畢賜茗飲降玉音難問勉飭衣冠之士及  
四夷之人圜大學而觀者以億萬計視東京永平無  
足言矣明日臣儼臣智率六堂儒生上表謝錫賚有  
差大宴羣臣于奉天門莫不懽忻踴躍以為自古帝  
王崇尚儒術未有若此之盛臣仰見太祖高皇帝告  
成武功大興文教臨幸太學親講經書與諸儒難疑  
答問終日弗倦今伏遇皇上尊信儒術躬率舊典有  
光前烈揆諸古昔誠無與比故盛治之風薄極海宇

凡四方僻遠非一譯所能通者遣一介之士持咫尺之書以諭之莫不奔走順服頓顙闕庭夫豈威力所能強是皆文教躬行之效也臣維孔子之道與天地相為終始其在於人心者昭晰不泯當聖人在上天下文明則其道大行皇上全聖智之德居至尊之位恢弘治教表章孔子之道如日麗天中四海之民皆仰見之俾知所趨向皇上作興人心推明世教誠有以度越千古非近代帝王所能及也臣廣猥以菲才



幸依日月之光獲覩文明之盛職在紀載不敢以默  
謹述為古詩一章以獻以播盛美於無窮焉詩曰

維古聖神繼天立極爰脩教化以彰明德曰堯舜禹所  
傳一心無間顯微爰有古今學校之政教化先務三綱  
以正九疇攸叙周網解紐正路日堙不有至聖孰宣人  
文大哉孔子道高德厚出類拔萃生民未有祖述憲章  
乃欲無言賢於堯舜事功則然教化無窮如天垂象六  
經昭晰萬世尊仰至治之要一本於茲生民永賴帝王

寔師於皇太祖受天明命道侔天地卓冠前聖武功爰  
定文教首崇表章絕學大闡休風載新庠序甄陶士類  
親臨璧雍以嚴祀事躬御講筵觀者如雲衣冠萬國集  
于橋門猗歟盛哉亘古莫比為憲萬世式承無已皇帝  
纘承舊章是遵緝熙聖學弗懈益勤季春初吉躬視廟  
學釋奠先師秉虔有恪袞服大圭星弁煌煌穆穆清廟  
濟濟裸將載臨講席列侍羣儒紬繹問難六經羣書聖  
道顯明皇心以喜章甫逢掖蹌舞士子圜瞻萬億華夏

蠻貊左衽雕題亦皆夷懌治有先後教有本源仁義之  
訓彌久彌敦於昭聖皇邇駿有赫洪化維神無思不服

平安南詩

并序 楊士奇

臣聞天以風雨霜露育成萬物聖人以禮樂征伐綏  
輯天下一出於至仁周之文武皆一怒以安其民故  
雖聖人不志用兵亦不去兵以為治洪惟我國家肇  
興太祖聖神文武欽明啓運俊德成功統天大孝高  
皇帝深仁大義順天應人平靖四方以教以育罔有

孽害時謂泰和至于皇上益廣仁義禮樂之化海內

奠安四夷嚮慕小大遐邇熙然同春惟是安南其王  
孱微其賊臣黎季犛暨其子蒼沿襲悖戾屢弑國主  
淫刑暴斂毒虐下人滋久滋甚皇上閔焉弗寧發詔  
使諭使遷悔賊罔忌畏數侵掠厥鄰占城又寇我思  
明祿州寧遠之地在廷之臣咸請發兵討罪上曰彼  
匪人乎斯不可終化發詔使申諭焉賊聞其主有遺  
信子奔來京師即上表謝過請還之上曰彼其庶幾

有悔乎遣使者衛送出境賊伏衆邀遏使者執殺其  
主遺脣子事聞皇上震怒召文武羣臣諭曰予承天  
命保康兆億民一民弗獲惟予弗恭人有弗迪而遽  
誅斯遏抑厥自新乃有弗迪至于再三而釋弗誅惟  
予弗君今盜滋弗迪予必不釋將往大正匪予志用  
武惟盜滋稔惡羣臣合辭力贊必決乃告祀天地宗  
廟及天下山川命征夷將軍左右副將軍左右參將  
暨神機橫海驃騎游擊鷹揚五將軍率師討賊師發

金川門上臨江送之諭之曰汝其代予往行天討惟盜暨厥子必誅弗釋暨同惡必誅弗釋凡厥脅從咸釋弗誅惟茲安南咸朕所統厥民滋困于盜罔攸訴告汝其代予往弔母有侵害或有侵害即既殄戮盜猶底汝罰既殄戮盜其咨求其王遺嗣子俾統治厥民往哉惟懋師入安南黎賊脅驅其民號若百萬拒于境上民聞王師來為已除害皆倒戈迓降師渡富良江入其東都城又入其西都城如蹈無人之地賊

窮迫盡棄其衆獨與其孥數人並海遁去王師追之  
悉生繫之不遺一人乃縱所脅從咨民所苦罷其苛  
禁敷求安南王遺嗣民既固有侵害又蒙哀矜弔恤  
悉解去所苦咸竊喜曰我幸復見今日幸聖天子不  
遐棄我萬里外而復生我欣然如脫虎口歸慈父母  
相率踞軍門言曰惟故安南王遺嗣悉殲于寇暴無  
遺惟茲土故隸中國誠願復列中國氓密比聖化俾  
我暨我子我孫咸免於寇暴軍中獻所獲俘且

具言民所欲皇上重違民意下詔郡縣其地選置守  
吏復置交趾布政司總之在廷文武羣臣上表稱賀  
臣惟安南本漢南越地武帝置交趾郡暨五季丁氏  
竊據之始僭稱王宋弗能制因授之卒循為常更歷  
數姓蟠結深固屢叛弗服宋元數舉兵誅訖無成功  
皇明奄有四海率先款服曾不踰世終梗寇盜天地  
之德務隆包荒累誨弗悛肆急援溺仁義之旅弔伐  
並行恩威所臨有迎無拒累月之頃肅清完懃大拯



塗炭弘復疆土功德俊茂振古無倫焉惟古帝王施  
德建功皆有頌歌傳播後世臣忝列從臣後輒擬古  
作者之意謨平安南詩一首以示後來謹拜手稽首  
上進詩曰

維天生民咸俾遂適有攸弗及肆命有德惟德格天為  
君為師以教以治俾適咸宜天啓皇明悉畀所覆明明  
太祖生育教誘衣之食之邇安遠歸禮昭義布長幼尊  
卑皇帝繼統四方萬國益富而教和豫安適蕞爾蠻交

醜孽其間為狼為豺小大畢殘皇曰彼醜匪異人類庶  
或改率予其化誨誨言諄諄弗遷益驕戕暴厥鄰盜我  
邊郊百辟文武頽伏陞言弗時翦屠將俾蔓延皇曰申  
誨猶或改率弗改弗率跳梁狂獮偽恭顓命賊我使人  
暨彼遺孽磔身百分皇曰彼醜獸心靡易螟螣弗除曷  
遺嘉稷惟皇上帝付予八埏有溺弗援予滋違天誕命  
將臣暨旅師徒往勵汝勇往宣汝謨咸弔困窮殲惟醜  
虜職敷予仁匪曰宄武六師逆邁辭直氣厲涉危蹈深

若履平地嘽嘽烈烈赫赫業業如飄剋剋如霆截截蠢  
彼醜虜脅驅為拒仁威天降孰有強禦雞翎夜闌富良  
為帶投兵委戈奔降迓拜乃入交城乃走允渠繫之海  
隅如採取雛乃咨脅從悉解而縱乃視交人弔其疾痛  
交人悴悴爰始色溫舒其兢兢爰始笑言交人有言我  
困荼毒天子生我旋膺為福交人有言我初匪夷邈遠  
淪汙陷茲塗泥天子聖仁曷返我初內我庇我永康不  
虞俘獻于廷天子受之民有願欲天子子之四夷有聞

懽喜告語天子聖仁我有父母救民之疾不以遐僻有  
梗弗率必誅不釋天子聖仁孔武且神孰其為梗鑒彼  
交人芒芒四裔威服德拊巍巍中夏奠安鞏固海航陸  
車來享來庭千萬億年拱我皇明

平寇詩

并序

洪惟上天眷佑我國家皇帝陛下以至仁大聖繼承  
太祖高皇帝鴻業為億兆生民主綏靖涵育四方萬  
國林林總總之生皆鼓舞忻戴趨走承奉惟恐不及

至於朔漠羶裘毛褐之衆各率其屬歸誠慕義拜俯  
闕下蒙荷官賞者不可勝計惟布尼雅錫哩弗率倔强  
化外皇上推天地之大德謂率土皆朕民其可使一  
芥獨失其性屢發詔使撫徠之乃弗悛益甚要執我  
使臣侵擾我疆場疆場之民罹其毒虐皇上憫焉弗  
寧謂皇天既付予天下天下有一民一物失其所予  
曷敢坐視不卹且仁者不姑息畜患以厲民彼怙終  
不可赦予必躬往視師以永寧我宗社生民時車駕

巡北京詔皇太子監國至是復詔皇太子告天地宗  
社及詔告天下以發兵所由遂命將閱師永樂庚寅  
二月丁未車駕發北京既出塞踰五雲關道壓虜川  
龍旂所嚮上天助佑風日和融消剥寒沍坤靈協贊  
積渙之野咸出甘泉潔清芳冽隨地而有士馬所過  
無不飫足衆心懽懽咸懷敵愾五月己卯車駕次玄  
溟河布尼雅錫哩率衆迎拒皇上以數百騎獨先大破  
之諸將率麾下繼進奮驅逐北布尼雅錫哩盡弃其族

屬牛羊輜重以七騎遁去諸將咸請追戮之皇上謂

帝王除暴祛之而已不窮殺以為武時將士生繫敵

衆來獻者萬計詔悉去其繫敵衆有釋兵以其屬來

附者又萬計皇上進而諭之曰若等悉吾民困于穴

孽懷蓄憤鬱不獲自歸久矣今朕不遠萬里來為爾

除害勿有疑畏悉給予所獲孽畜俾自擇便地以居

皆懽喜膜拜舉手加額呼萬歲寇衆遂平獨支寇阿

嚕台初聞天兵且壓境率衆先遁上曰此固竄匿不

能遠當還師撲之如拾芥耳及班師六月甲辰至靜  
虜鎮寇衆來奔者具言其狀徑搗之寇迫急請降上  
曰彼欲緩我師耳必詐也麾將士上馬控弦以俟言  
未既敵悉衆薄我右翼諸將赴之未決上麾虎賁三  
千奮進斬敵敵大震怖悉解甲去弓矢俯伏降阿魯  
台以數騎遁去遂誅其同惡盡釋其餘從而撫定之  
絲是瀚海迤北沙漠萬里悉平悉寧封山勒石紀述  
功德告示萬世七月壬午車駕至北京中外臣民懽



忻舞蹈臣惟北部之為邊鄙患自古而然皇上乘中  
興之運奉若天道恢弘治化奮揚神武廓清六合功  
德隆盛宜有詠歌宣播無極臣忝執筆從詞臣後謹  
撰平寇詩一首上進詩曰

皇明受命統御寰宇皇帝仁聖承序太祖以教以理治  
于率普神化所濡涵泳鼓舞逖彼朔土負恃遐阻弗馴  
弗悛執我使者橫縱桀驁跳梁醜覩毒其與處連我邊  
野人之鞠窮鬱憂以癩叫號昊天盍于我抒皇帝仁聖

憫焉興憊曰時天氓彼敢虐苦惟天命予予曷敢捨彼  
絕於天匪予志武乃命將臣整徒閱旅告誓啓行以類  
以旅六師導御萬乘從扈如雷如霆如飆迅騫萬里一  
瞬飛越崦嵫謨斷自天孔神且訐計遐測幽瞭如矚睹  
逝彼朔土夏不解沍芒芒磧溷沃渴惟乳皇德格天昭  
畬靈祐春暘流敷融麗昁昁甘泉洋洋徒乘厭飫競奮  
敵愾踴躍馳赴搗其中堅玄冥之濔揮戈擊及闕若虢  
虎彼駭且狃强抗螳斧殲之糜腐縱惟七馬乃有支孽

潛伏于莽一鼓而擒迅於焚羽肆犁其藪散其藏聚皇  
帝有詔厥衆咸赦解其繫縛綏其降附曰予寧汝汝罔  
予懼汝飢錫汝馬牛肥羜蘇其創殘伸其噢咻如旱暵  
焚霈施甘雨懽呼膜拜皇帝聖主我昔罔知今我父母  
皇帝神武德施弘溥惠彼朔野同我中土夷堆去防罷  
革邊戍邊人肆寧如愈沈痼彼獷始悔如寤斯寤往來  
孚好無有疑迓帝曰康哉其還予駕雍雍凱歌懽騰載  
路四方萬國奔賀拜俯皇帝功德超冠千古相彼自古

夏殷而下漢唐及宋咸弊厥侮于備于禦不以晨暮財  
殫力劬卒罔驅去帝御九五降治弘化肆揚神武抉剔  
民惡洗濯曠蕩俾民得所五兵偃戢四海熙豫宣昭人  
文丕闡皇度億萬斯年永隆宗社臣謹作詩以繼肆夏

清邊頌

并序

鄒緝

臣緝稽首頓首言臣伏惟皇帝陛下以天錫勇智之  
資具聖神文武之德紹嗣太祖高皇帝之統緒克勤  
克慎懷保小民外暨四夷咸加惠撫威德所至無遠

不服東極朝鮮日本南踰交趾西抵番戎大邦小國  
以至海外諸蠻夷君長悉皆臣附來朝貢獻不絕而  
獨北邊殘寇遺孽未底寧順往者阿魯台梗化弗庭  
數為寇害皇帝親御六師以討之阿魯台奔命不支  
由是款塞稱臣朝貢于闕下皇上功德之盛已莫與  
並矣惟衛拉特三酋昔受封爵于朝為邊疆之臣而  
乃背恩棄信阻兵構逆與其黨類互相讎殺且復寇  
掠我邊境殺傷我人民皇上以為此叛命之臣不可

以不討之也復選將命師親駕往征之六月進至索

勒濟爾之地遇寇兵與戰擊走之追至圖拉河逆酋

大集其衆據險阻以拒我師我師勇銳齊發左右奮

擊大破之殺其酋長及其衆數千人追奔逐北乃救

死扶傷不暇乘夜遁走漠北為之遂清乃命諸將班

師而還至飲馬河和寧王阿魯台遣其酋長來朝上

撫以恩信慰而遣之六月振凱還北京臣緝於是稽

首頓首言曰自古聖德之君必以安攘為首務蓋斯

民既安而寇暴未除終為邊境之患在周之時獫狁作難宣王興師以伐之觀之六月之詩可見矣漢武帝之逐匈奴唐太宗之擒頡利皆以其患害滋甚不得而不討之也五代及宋契丹女真迭盛幾有宰割天下之勢元人繼之遂乃經營力征混一海內天下之民俯首內向而從之者幾百年我太祖皇帝受天明命起自布衣躬親師旅削平寇亂既已飭埋區夏而底之太平民生其間熙熙皞皞復睹三代盛王之

治矣皇上紹承大統繼守先業復翦剔其芽枿而剋  
盪之神謀睿筭預決勝於萬里之外以成千古所無  
之功使三邊永寧天下蒙福真所謂功高百王而紹  
隆古昔帝王之治也臣緝不勝慶幸謹撰永樂清邊  
頌一篇拜手稽首以進其辭曰

聖王在御四夷咸附悉享悉臣孰敢違忤天之所覆地  
之所承殊方絕域莫不來庭蠢茲醜族包有遺枿煦沐  
涵恩以長以息惟皇之德懷附以仁錫之封爵俾長其



人大漠之墟窮陰之野息養蕃滋以有羊馬乃逞其充  
乃肆其奸驕欲是為因構兵端同類相讎遏我來附掠  
境盜邊以啓皇怒皇帝曰吁曷可不治宜飭六師往伐  
殛之乃修我戈乃整我旅乃奮我謀乃振我武旗纛旄  
鉞連屬後先擬金伐鼓震盪山川北出興和直指沙漠  
虎旅長驅聲震窮朔進抵其營索部震驚百萬之衆如  
雷如霆如熊如羆莫不齊奮電掣馳川嶽變眩天戈  
所指孰有不摧既殲其衆亦殞其魁遏彼大酋翦其遺

藁投石糜穀振枯隕葉陰山瀚海所向無堅順附則全  
違逆則顛既剋既除既獮羣醜盪剔稂莠疎遠斥堠旋  
師飲馬撫納降人綏之懷之其來填門凱入居庸萬民  
呼抃鐃吹高喧懽騰交甸邊塵絕息皇心攸寧飲至策  
勛賞賚兼行爾侯爾伯錫爵進秩爾將爾吏咸加優恤  
皇曰汝士惟汝予功嗟汝勞瘁其休汝躬無功不酬無  
勞不錄凡在于行悉蒙優渥羣方九有同仰大明無小  
無大各遂生成乾端坤倪清夷軒豁異域殊邦悉從包

括聖功既遠聖德益昭霈澤旁施上齊軒堯選賢任能  
置在左右同享太平以期永久三邊靜謐烽燧不傳於  
皇聖世惟億萬年

騶虞詩有序 梁潛

臣聞自古聖帝明王至治之極必有禎祥若麒麟鳳  
凰醴泉甘露應時而產皆所以符聖徵彰至德者也  
乃永樂二年秋八月皇帝冢弟周王畋于釣州厥有  
異獸白質黑章貌首虎軀其狀孔威不可迫視王俾

部曲俟之其性孔仁遂擾致之以詢之故老蓋古所  
謂騶虞者此其是已夫惟人君有至信之德則見於  
是九月丁未王率厥屬表獻闕下皇帝服皮弁服御  
奉天殿以觀不震不動柔伏自然皇帝若曰厥為嘉  
瑞予罔敢知維致自昆弟之邦予其嘉焉於是太子  
太師淇國公臣丘福謹率百官上千萬歲壽既而京  
師人士忻喜聚觀咸以為聞自古昔見始今茲臣潛  
伏覲盛典不敢自默退而考之騶虞詠於詩記於禮

列於傳記或以為義獸或曰仁獸或曰聖獸至以為  
嘉祥者則其言皆同也傳曰國家將興必有禎祥洪  
惟皇上紹登大寶率由舊章親親而仁民恩沛而義  
洽萬方咸和以及乎庶類忝同穎於郊蠶成繭於野  
文犀白象諸福之物抑之而愈臻却之而復至何其  
盛也豈非上天以是昭至德哉臣潛忝職記注苟不  
形之歌詠以垂示無窮輒為不職謹百拜稽首而獻  
詩曰

於穆聖皇綏懷兆民端本自家篤於周親恩沛義治如  
煦春陽至和沖融發為禎祥禎祥伊何厥惟騶虞產于  
王國惟皇德符王馴致之獻于帝庭素質玄章雲舒霧  
凝帝乃觀焉載戢其爪爰言究之踐匪生艸吁嗟騶虞  
外何其威內何其仁匪苞而鳳匪角而麟吁嗟騶虞曷  
為來哉王拜稽首皇則召之皇之仁民淪膚洽肌弘暢  
旁達物以不疵皇之孝友本乎至性萬邦咸懷物以類  
應皇帝曰俞惟王信恭王乃麟趾奚必騶虞皇帝曰吁

凡百在位惟德召和匪物其瑞庶臣拜手皇帝萬壽慶  
祥畢臻德音是懋

瑞應甘露詩 并序 王直

臣聞聖人之德配天地則天地之心欣合無間故必  
凝英萃和以昭其盛若黃帝之甘露虞舜之卿雲是  
也恭惟皇帝陛下以至誠之德統承太祖高皇帝基  
緒繼述之孝不忘乎公遵用舊章未嘗改作德化所  
及罔不愛戴故自天地之所覆載日月之所照臨無

有遠邇熙然泰和動植之物亦各生遂而太祖高皇  
帝之盛德大業愈益光明是以天發其祥地闡其珍  
景星慶雲醴泉甘露嘉禾瑞麥麒麟騶虞諸福之物  
駢臻沓至此臣等之所親見天下之所共知也而聖  
心惓惓益勤不懈乃永樂十七年十一月某日甘露  
復降于孝陵凡四日松柏之上凝為玉脂融為瓊液  
粲若垂珠聯若編貝臣民聚觀鼓舞懽抃咸以為甘  
露之降不于其他而于孝陵者蓋聖孝所致也於是



皇太子命採取馳獻于北京皇上祇薦宗廟頒賜百  
官芳香之氣旁達左右甘美之味莫可擬倫誠天地  
之精英聖明之上瑞所以彰皇上之大德為天地之  
所悅鑒景命之隆長太平之悠久歷千萬世而益盛  
也昔虞舜有卿雲之祥百工相和而歌之萬世之下  
因是想見帝舜之德使人起敬起慕今聖德之大實  
同天地甘露之瑞不減慶雲是宜有紀也臣愚不自  
揆輒形之聲詩以繼虞廷之歌垂之萬世使知聖德

格天之盛巍然煥然如此臣等誠懼誠忤稽首拜手  
謹言

有瑞甘露其集灃灃被于長松孝陵之岡如珠之英如  
瓊之漿於粲其光承彼朝陽有瑞甘露其融湜湜亦被  
于柏孝陵之側如肪斯白如玉斯潔其馨有烈敷暢旁  
達維彼露兮天乳之滋維此受兮上帝之貽皇有大德  
神人具依集此大瑞福祿攸宜皇德之大實配于天永  
言孝思太祖是憲懿彼舊章于嗣于宣夙夜敬恭穆穆

乾乾維太祖肇邦皇以廣之維太祖受命皇以康之顯  
顯大猷萬邦仰之巍巍成功無以尚之上帝太祖樂此  
德馨屢開厥祥甘露斯零甘露斯零維帝命是膺維太  
祖是承皇祚以攸寧乃取乃獻皇太子之恭乃賜乃頒  
以洽于臣工匪飴匪醕既甘既融靈液攸降物莫與同  
臣拜稽首天子萬年以臨下民以對上天維禎維祥繼  
繼綿綿聖子神孫萬世之傳

芝頌 并序

禮部尚書毘陵胡公於廨署之南作小軒以為思政之所凡公之佐天子舉禮樂以施政教則必思其宜於此而後行之天下公忠信明達君子也其精神感而和氣應之蓋有不期然而然者宣德八年九月軒之中甃甃隱起發而視之有芝生焉其色純白如刻玉如截肪輪囷敷暢鮮潤華好公卿大夫來觀皆以為瑞而贊詠之夫芝之瑞始於漢重於唐至宋而極盛蓋謂和氣薰蒸之所成非人力能為也然彼宮殿

門廡之所產者國之瑞也生於士大夫家倚廬齋閣之中者家之瑞也今皆不然惟於公思政之所見之蓋公盡心於其職故天以是彰厥美則茲瑞為公精誠之應無疑也然竊思之公之所任大矣其應亦有大者焉此特其兆也禮曰樂者天地之和禮者天地之序又曰禮樂極乎天蟠乎地行乎陰陽通乎鬼神此豈細務哉今上有聖明之君而下得公之賢以為臣厚禮樂之本達禮樂之用極其至也天地安其位

日月著其明四時寒暑順其序明而為人幽而為鬼神流而為川峙而為山精而為百穀粗而為草木鳥獸一皆遂其性無毫髮爽焉至和之氣充周于六合之間則甘露醴泉器車馬圖龜龍麟鳳諸福之物靡不畢至而國之大瑞備矣故曰此特其兆也有其兆而贊詠之思迓續其大者云爾烝民之詩尹吉甫送仲山甫也而序者以為美宣王蓋能任賢使修其職宣王之美見矣今公之有此皆上委任之所致則諸

公之贊詠雖以美公而亦以美朝廷也作芝頌

春官名卿禮樂宗茲誰任者毘陵公美哉新署鬱穹崇  
華軒結構居南東聖明在上眷遇隆懷清履直持敬恭  
孜孜夙夜亮天工施諸政教審厥衷精誠孚暢靡不通  
靈芝煌煌產其中至和綢繆之所鍾殊姿密理鮮且重  
刻脂鏤玉紛璵璣參成樊桃差可從瑤英紫脫徒茫茫  
嘉生本自造化功滋殖豈與凡卉同知公秉德久愈充  
輔翼帝道宣皇風上追夔夷躡高蹤體信達順更豐融

四靈畢至百福隆君明臣良格昊穹頌歌繼作聲泚泚  
鴻名赫奕垂無窮

明文衡卷二十